

**Meeqqanut ilaqtariinnermullu politikkimi suliniutit nutarsarneqarnissaannut apeqquteqaat aallaavigalugu oqallisissiamik siunnersuut, taamaalillutik angajoqqaanngortussat angajoqqaanngornissaminnut sapersannginnerussammata.**  
(Inatsisartunut ilaasortat Andreas Uldum aamma Justus Hansen, Demokraatit)

### **Akissuteqaat**

(Isumaginninnermut Naalakkersuisoq)

Apeqquteqaat aallaavigalugu oqallinnissamut siunnersuusiamut nassiunneqartumut qujanaq, tassani qitiutinneqarpoq, qanoq ililluni angajoqqaanngortussat pitsaanerpaamik angajoqqaanngornissat qulakkeerneqarsinnaanersoq.

Naalakkersuisut ilisimavaat *Meeqqat meerartaartarnerisa* angajoqqaatullu akisusaaffimmik pilersuisussaataalernissaminnulluunniit iluamik isumaginnissinnaannginnerisa malitsigisaanit ajornartorsiuteqartoqartarnera.

Taamaammat Naalakkersuisut Naalakkersuisunut ilaasortap Jens B. Frederiksenip, Demokraatit kaammattuineratigut, angajoqqaanngortussanut tamamut ilinniartitsinissamik aallarnisaapput angajoqqaanngortussat meerartaassaminnik pitsaasumik perortitsinissaminnut sapersateqannginneruniassammata.

Demokraatiniit soqutiginninneq Naalakkersuisut qutsatigaat pilersitsiniarnerlu pitsaasutut isigalugu. Angajoqqaanik ilinniartitsinissap qitiutinneqarniarneranut tunngasutigut kiisalu inuiaqatigiit kalaallit akornanni angajoqqaatut inissisimanerup kinguneqartussamik oqalligineqarnisaanut peqataalluni

Suliassartarpiaa PAARISA-mut tunniunneqarpoq, taanna peqqinnissaqarfik suleqatigalugu suliamik ingerlatsissaaq. Ilinniartitsineq erninissamut angajoqqaanngortussanillu piareersaataasumik pikkorissartitsinernut ilanngunneqarluni ingerlanneqassaaq aamma danskit suliaat "Meeqqamut piareerneq" aallaavigineqassaaq. Tassani anguniarneqarpoq sumiginnaanissamik pitsaaliuineq angajoqqaat timikkut misigissutsitigullu meeqqaminnik isumassuinissamut ineriartornissaannik kajumissaarlugit ilinniartinneqarnerisigut. Suliap pisortatigoortumik taaguutigivaa Meeqqamut Piareerneq.

Ilinniartitsineq tallimanik immikkoortortaqarpoq, taanna ilaqtariinnut meerartaartussanut nalinginnaasumik erninissamut piareersarnissamik neqeroorfigineqarnerannut atatillugu neqeroorutigineqassaaq.

Ilinniartitsineq septemberimi Upernavimmi aamma Nuummi qaammammi uani ingerlanneqarpoq. Tamatuma saniatigut Ilulissani, Sisimiuni, Aasianni, Paamiuni, Tasiilami Ittoqqortoormiunilu juumuut ukioq manna oktoberimi Nuummi isumasioqatigiinnermut allamut atatillugu ilinniartinneqarput.

Sapaatip akunnerani 47-mi aamma 48-mi pinaveersaartitsinermut siunnersorti Nanortalimmut, Narsamut Qaortumullu angalaniarpoq, taavalu 2010-mi Maniitsumut, Uummannamut Qeqertarsuarmullu angalassalluni.

Aammattaaq 2010-mi malitseqartitsisoqassaaq, illoqarfinni taakkunani ilinniartitsinerup 2009-mi atuutsinneqarfigilingaani.

Suli aamma ukiuni pingasuni "Ilaqutariinnut meerartaartussanut siusissumik suliniuteqarneq" Innuttaasut Peqqissuunissaannik Suliaqarnermi, Inuunerittap ataani ingerlanneqarpoq. Suliniutip pingaarnertut siunertarivaa, meeqqat akornanni naartuuneranniit marlunnik ukioqalernissaasa tungaanut sumiginnaanernik siusissumik pinaveersaartitsinissaq, ilaqutariit meerartaartussat immikkut tapersersorneqarnissaminnik pisariaqartitsisut tapersersornerisigut.

Sullinniakkat tassaapput ilaqutariit meerartaartussat, taakkunani erngummatigissallugu tunngavissaqarpat, ilaqutariit meeqqap naartuulerneraniit marlunnik ukioqalernissaata tungaanut meeqqamik tapersersuinikkut isumassuinikkullu pisariaqartitaanik tunniussinissaq ajornakusoortissinnaagaat.

Suliniut piffimmi sulisunut neqerooruteqarpoq periuseq faginut pituttorsimangitsoq tunngavigalugu naartusunik immikkut pisariaqartitsisunik maluginiaanissamut, kiisalu iliuusissatut pilersaarussianik suliaqarnissamut ataqatigiissaarinissamullu. Ilaqutariinnut meerartaartussanut siusissumik suliniuteqarneq ullumikkut Nuummi, Aasianni, Sisimiuni, Ittoqortoormiuni, Tasiilami, Paamiuni Ilulissanilu atuutsinneqalernikuuvoq.

Aammattaaq Naalakkersuisut kissaatigaat innuttaasunut siammasissumik pissutsinik allannguinnissaq tunngavigalugu paasisitsiniaasoqassasoq, taamaasilluni meeqqat atugarissaarnissaat nalinginnaasumillu angajoqqaatut inissisimaneq qitiutillugu alaatsinaanneqalissammat. Tassani suliniummi "Meeqqamut piareernej"-mut atortussiat paasiuminarsariarlugit ilaatigut atorneqarsinnaassapput.

Suliniut alla nutaanngorsaataasinnaasoq tassaavoq, nalunaarusiaq qanittumi saqqummersinneqartoq "meeqqat ilaqutariillu atugarissaarnissaat pillugu innersuussutit" taanna aamma "siusissumik suliniuteqarnermut tunngasoq" tunngavigalugu innersuussutitaqarpoq. Innersuussutit suliaqarfiit sinniisuutitaannit kattuffinniillu kajumissutsiniminnik peqataasunit kiisalu inunnit ilinniarsimasunit inuttaqartinneqartunik suleqatigiisitaniit arfineq marlunnit suliarineqarput.

Tamaasa ataatsimut isigalugit aallarniinerit ilai piffissami aggersumi meeqqanut inuusuttuaqqanullu periuseriniakkamut toqqammavigitinneqassapput, taannalu ukiup ingerlanerani Naalakkersuisunit piviusunngortinniineqarpoq.

Naalakkersuisut Inatsisartut partiianniit sullinniakkanut pitsaasunik aallarniinerusinnaasunut isumassarsiaasinnaasunik tigusaqarusussinnaapput.

Aammattaaq pitsaasumik oqallinnissaq qilanaarineqarpoq. Naggasiullugu Naalakkersuisut aammaarlutik Inatsisartunut ilaasortat Andreas Uldum aamma Justus Hansen, Demokraatit, qujaffiginiarpaat, sammisaq pingaaruteqarluinnartoq pillugu soqutiginnilersitsimmata, tassalu siunissami kinguaariit atungarissaarnissaat.